

neque fidem confirmant, neque mores hominum emendant. Dantur etiam in Theologia theses, quæ non involvunt connexionem cum salute, & in utramque partem trahuntur, aliis eas affirmantibus, aliis easdem negantibus. Quales sunt quæstiones de die, quo lapsi sunt angeli, & quale fuerit eorum peccatum, ut & de insigni quadam Judæorum conversione, quam ex Rom. XI. v. 25. 26. quidam adstruunt, de immortalitate primi hominis ante lapsum, ut & utrum anima producat per traducem, an vero per creationem, aliæque plures. Ejusmodi quæstiones neque mediato neque immediato nexu cum articulis fidei cohærent, adeoque salva salute vel affirmari vel negari possunt. Attamen observandum, alteram tantum sententiam esse veram, quia contradictoria simul vera esse non possunt, licet saluti non obsit, utram sententiam sequaris. Sed in determinatione ejusmodi quæstionum scripturæ autoritas & fidei analogia est respicienda. V. g. Si de immortalitate Adami ante lapsum quæras, respicias Scripturam, quæ docet, mortem per peccatum intrasse, aut ante lapsum nullum fuit peccatum. Si quæras de propagatione animæ, caveas, ne eam negando & creationem asserendo multum labores, quomodo anima peccatis contaminetur. Tandem ejusmodi quæstiones tanto fervore non sunt tractandæ, sed prudens modestia dirigat linguam, ne amoris vinculum rumpatur, & dissensus in schisma degeneret. Memores simus controversiæ levioris momenti, de die, quo Paschatis solennia celebranda sint, quæ inter Victorem Romanorum & Polycratem Ephesiorum Episcopum agitata est. Orientales Ecclesiæ, quibuscum faciebat Polycrates, celebrarunt Pascha 14. die Martii; Occidentales vero Dominica sequenti. Orientales morem

C

sibi